

Script of Morning Gojri News Bulletin 28 December 2024 at 1015Hrs

مارننگ گو جری نیوز بلیٹن مورخہ 28 دسمبر 2024

یوہ آکا شوانی جموں ہے محبوب سلطانی تیں خبر سنو۔

Manmohan Last Journey

سابق وزیر اعظم منموہن سنگھ غی آخری رسومات اج نوی دہلی مانہ سرکار ی اعزاز سنگ ادا کی جائیں گی، تے اُن غا جسدِ خاکی نانہ آخری رسومات واسطے نوی دہلی مانہ آل انڈیا کانگریس کمیٹی غا دفتر توں نیگامبودھ گھاٹ لے جا یو جا رہیو ہے، تے 11 بجے 45 منٹاں ور سرکار ی اعزاز سنگ سابق وزیر اعظم غی آخری رسومات ادا کی جائیں گی۔ اس تیں پہلاں اُن غا جسدِ خاکی نانہ اُن غی رہا ئش گاہ ور رکھیو گیو تھو تانجے اُنہاں نانہ خراج عقیدت پیش کیو جا سکے۔ اس ضمن مانہ اج سویرے 8 بجے اُن غا جسدِ خاکی نانہ آل انڈیا کانگریس کمیٹی غا دفتر لے جایو گیو تانجے کانگریس ورکر تے عوام خراج عقیدت پیش کر سکے۔

Home Ministry Memorial

وزارت داخلہ نے دسیو ہے جے سرکار سابق وزیر اعظم ڈاکٹر منموہن سنگھ غی یادگار واسطے جگہ مختص کرے گی۔ اس ضمن مانہ وزارت داخلہ نے اپنا بیان مانہ دسیو ہے جے حکومت نانہ اس سلسلہ مانہ گذشتہ روز کانگریس صدر ملک ارجن کھڑگے غی طرفوں اک درخواست موصول کی تھی۔ وزارت داخلہ نے دسیو ہے جے مرکزی کابینہ غا اجلاس غے فوراً بعد وزیر داخلہ امت شاہ نے ملک ارجن کھڑگے تے ڈاکٹر منموہن سنگھ غا خاندان سنگ رابطو کرے جے حکومت یادگار واسطے جگہ مختص کرے گی۔

Agri Project

جموں کشمیر مانہ زرعی محکمہ نے تبدیلی آلے پاسے اہم قدم چاتاں واں یوٹی مانہ زرعی بنیادی ڈھانچہ غی تعمیر واسطے 1 سو 17 عشاریہ 59 کروڑ روپیاں غی مالیت غا منصوبیاں نانہ منظوری دے دتی ہے۔ یاد جانکا ری زراعت، دیہی ترقی تے پنجابیتی راج محکماں غا وزیر جاوید احمد ڈار نے جموں مانہ منعقدہ اک اجلاس غے دوران دتی ہے۔ وزیر موصوف نے دسیو ہے جے زراعت، مال چوکھر تے سی اے ڈی ڈبلیو ایم غے تحت ان منصوبیاں غی منظوری پائیدار زرعی ترقی تے دیہی خوشحالی آلے پاسے اک اہم قدم ہے۔ اُنہاں نے کہیو جے یہ منصوبہ نہ صرف زرعی بنیادی ڈھانچہ نانہ بہتر بناویں غا بلکہ آبپاشی غی کارکردگی مانہ وی اضافو کریں گا۔ اُنہاں نے مزید دسیو جے نبارڈ غے تحت منظور کیا گیا دیگر اہم منصوبیاں مانہ محکمہ مال غا 12 منصوبہ وی شامل ہیں۔ جن مانہ 11 مال چوکھر غا ہسپتال تے اک تربیتی ادارہ غی تعمیر تے بہتری شامل ہے۔

Javed Rana

جل شکتی تے قبائلی امور بارے وزیر جاوید رانا نے ضلع پونچھ غی تحصیل مینڈھر مانہ تمام محکماں غا افسراں سنگ اک جائزہ میٹنگ منعقد کی ہے۔ جس مانہ ضلع پونچھ اندر بکھ بکھ سکیمان غے تحت جاری بکھ بکھ ترقیاتی کماں ور ہوئی پیش رفت غو جائزو لیو گیو۔ اس میٹنگ مانہ تعلیم تے صحت غا ڈھانچہ نانہ مزید بہتر بنان، کلسٹر ٹرائبل

ماڈل ولیج، جل جیون مشن، قبائلی بہبود غی اسکیمیں تیں علا وہ دیگر غا مسئلاں ور گل با ت کی گئی۔ اس دوران میٹنگ سنگ خطاب کرتاں واں جناب جا وید رانا نے زور پایو جے چل رہیا پروجیکٹاں نانہہ متھی وی مدت اندر مکمل کیو جا ئے تا نچے لوکاں نانہہ ویلے سر ان غو فائدو پجایو جا سکے۔ انہاں نے افسراں نانہہ ہدایت جا ری کرتاں واں کہیو جے اک ایسو نظام تیار کریں تا نچے بکھ بکھ سرکاری اسکیمیں گا فائدہ نانہہ ضرورت منداں تک پجان نانہہ یقینی بنایو جا سکے۔

Archived Repository

جموں غا دستاویزی ذخیرہ نانہہ محفوظ کرن واسطے اک پہل کی گئی ہے تانچے تاریخی ریکارڈ تے دستاویزاں نانہہ محفوظ رکھیو جا سکے۔ دستاویزی ذخیرہ جموں کول 17 وی صدر غا تاریخی ریکارڈ جس مانہہ مخطوطات، دستاویز تے تصویراں غو اک بڑو ذخیرو موجو د ہے۔ یوہ ریکارڈ جموں کشمیر غی تا ریخ غا با رہ مانہہ قیمتی معلومات فراہم کرے تے خطہ غا ثقافتی ورثہ غو اک اہم حصو ہے۔ اس ضمن مانہہ دستاویزی منصوبہ غا ماہر عملہ غے ذریعے تکنیک تے آلات غو استعمال کر غے ریکارڈ نانہہ محفوظ بنا رہیا ہیں۔

Poonch Rescue

پونچھ پولیس نے گذشتہ شام ہوئی خاصی برف باری غے بعد مغل روڈ غا چھٹا پانی غا مقام ور پھنسیا واہ 6 مسافراں نانہہ کامیابی سنگ بچا ليو ہے۔ اس سلسلہ مانہہ اک پولیس ٹیم جس غی قیادت ایس ڈی پی او سرنکوٹ، ایس ایچ او سرنکوٹ تے آئی سی پی بی بہرام گلا کر رہیا تھا نے فوری طور ور ات پُج غے بچاؤ کا روائی مانہہ حصولیو تے اس سلسلہ مانہہ بچاؤ ٹیم غی طرفوں جلد تے کامیاب کا روائی غی بدولت تمام 6 مسافراں نانہہ باحفاظت اُتوں کھڈ آئیو۔ واضع رہ جے یوہ واقعو اُس ویلے پیش آيو جد شوپیاں توں سرنکوٹ غی طرف اُربی دو گڈیں خاصی برفبا دی غی وجہ توں چھٹا پانی غا مقام ور پھنس گئیں تھی۔ اس سلسلہ مانہہ پونچھ پولیس نے برفباری آلا اُچیرا علاقاں مانہہ سفر غے دوران محتاط رہن تے موسمی حالات سنگ باخبر رہن بارے کہیو ہے۔ اُن غو کہنو تھو جے لوکاں غی حفاظت تے بہبود مہاری ترجیح ہے۔
